

PELAJAR 10

PENGASIH

Ngena kuasa ti besai bala rasul terus madahka pengangkat Tuhan Jesus sereta pengasih Iya ti BESAI nyereta semua sida. (SPKR 4:33).

“Lalu ari nya seduai belayar mulai ka diri ka Antiok, iya nya endur alai orang mayuh udah besampi minta pengasih Allah Taala enggau seduai ka pengawa ti diatu udah tembu.” (SPKR 14:26).

Nama kebuah pengasih Tuhan amat berguna ba dalam pengidup orang ti baru nyadi orang Kristen? Nama kebuah gerija ba Antiok besampi lalu pengasih Tuhan nurun ngagai Paul seduai Barnabas, udah nya ngagai Paul seduai Silas lebuah sida deka berengkah bejalai merita ka Injil?

A. RETI PENGASIH

Reti leka jaku ‘pengasih’ ianya ‘tulong ti enda ulih dibeli’ taja pen kitai orang ti bedosa, kitai patut nerima ukum tang Tuhan merening kitai ngena pengasih Iya sereta ngampun penyalah kitai.

Tang nya semina setengah ari reti leka jaku ‘pengasih’, ia mega mai reti ‘pengering Tuhan ti ngasuh kitai ulih.’

“Awak ka Jesus Kristus Tuhan kitai enggau Allah Taala ti Apai kitai, ti rindu ka kitai, lalu dalam pengasih Iya selalu meri kitai pengering enggau pengadang ti tetap, meransang ati kita lalu negap ka kita dalam semua kereja enggau jaku ti badas.” (2 Tesalonika 2:16,17).

Pengasih Iya enda semina ngasuh kitai diterima nyadi anak Tuhan, tang mega pengering ti disediaka ungkup kitai awakka idup dalam pengidup Kristen. Dua baris jaku tu ti nunjuk ka dua utai ti bisi ba dalam pengidup siko-siko orang ti arap dalam pengasih Tuhan.

1. Saup Tuhan Ti Enda Ulih Dibayar

“Laban ketegal pengasih Allah Taala kita udah di-idup ka baru, ulih pengarap. Nya ukai pengawa kita tang pemeru Allah Taala. Nya alai nadai kebuah temegah ka nya, laban nya ukai bepun ari pengawa kita.” (Epesus 2:8,9).

2. Pengering kuasa Allah Taala

“Apin penumbuh dunya Allah Taala udah milih kitai ka anembiak iya dalam Kristus, awak ka kitai tuchi sereta nadai penyalah di mua Iya. Laban pengerindu ati Iya, kenyau ari pun Allah Taala udah ngeletak ka kitai nyadi anak iru iya ulih Jesus Kristus-nya ti dikerindu enggau ti dikedeka iya. Awak ka kitai meri terima kasih ka Allah Taala ketegal pengasih iya ti bemulia ti diberi ka kitai dalam Anak ti dikerindu Iya.” (Epesus 1:4-6).

Ba dalam penyelamat, enda semina saup Tuhan ti enda ulih beli dipandangka (endur kitai nerima pengampun sereta kaul kitai enggau Iya digaga manah baru taja pen kitai enda ulih nerima nya) tang pengering Tuhan ti enda ulih banding, semina ulih pengering Iya kitai ulih diubah.

“Lebuh barang orang besaum enggau Kristus, iya nya orang ti baru; iya ti lama nadai agi, iya ti baru udah datai” (2 Kor 5:17).

Pun pengasih tu datai nengah pengawa kitai ti bekaul enggau Tuhan. Ba dini-dini endur ba pengidup kitai ti nyadi orang Kristen, nya meh pengasih Tuhan ti ngujungka kitai mansang lalu nyadi kering, pengering Tuhan ti enda ulih banding nyukung kitai tang ukai pengering kitai empu.

“Tang mansang kita dalam pengasih enggau penemu Tuhan kitai enggau Pengelepas kitai, Jesus Kristus.” (2 Pet 3:18).

B. PENGASIH DIBERI NGAGAI SIDA TI BEPENGARAP

Pengering ti datai ari pengasih Tuhan dipandangka ba dalam pengidup mensia, lelaki enggau indu ba seluruh isi Bup Kudus. Setiap orang ti udah arap ngepun ka pengarap sida enggau bepanggai ngagai Tuhan lebh sida nemu pengelempi enggau nemu diri enda ulih.

Semina nengah pengasih Tuhan, pengering ti ngasuh kitai ulih, iya ti tau dikarapka bekereja ba dalam pengidup kitai dataika ngasuh kitai ulih nyadi sebaka ti dikedeka Tuhan lalu ngemenuhka pelin enggau tuju Tuhan ba pengidup kitai.

C. PENGASIH TUHAN BA DALAM PENGIDUP MUSA

Bacha ba Pemansut 3:11-13; 4:1-13. Perintah Tuhan ngagai Musa ukai siti tanggung pengawa ti mit. Ejipti siti ari menua ti bekuasa lebh maya nya. Menua nya diperintah sitan, Pharaoh ketuai menua ti merintah enggau naka penyai, ngasuh orang nyembah iya baka tuhan. Iya balat dikenakut setiap iko orang ba dunya.

Lebh Tuhan ngasuh Musa bejalai ngagai menua Ejipti lalu ngelepas ka tiga juta bansa ti udah dipilih Tuhan ari dikeduan, Musa ngenung lalu beperagam-utai tu ba luar pengering enggau tangkup iya-baka tu:

3.11 Sapa meh aku?

3.13 Siapa meh nuan?

4:1 Sida enggai arap ka aku?

4:10 Aku enda bejako seleka!

4.13 Tuhan, asuh orang bukai.

Tang laban pengasih Tuhan, Musa berangkat ngagai menua Ejipti, ngena kelai enggau penuh kuasa Tuhan ulih mai orang Israel pansut baka ti dikedeka Tuhan.

D. PENGASIH TUHAN BA DALAM PENGIDUP GIDION

Bacha Pengulu 6:1-24. Kangau Tuhan didinga Gidion ngambika ngelepas ka orang ti dipilih Tuhan ari kuasa orang bansa Midian. Orang Israel udah betaun-taun diperinsa orang Midian. Perening Gidion ngagai kangau Tuhan ba ayat 13 nunjukka nadai bisi pengarap ulih ngereja utai.

Ko Gidion bejako enggau Iya, “Tuhan, nama kebuah pemerinsa ti baka tu nyadi ba kami, enti Tuhan amat endang enggau kami? Kini ka penunga utai ti nyelai ti ditusui sida aki ini kami dulu

kelia, laban kenu ko sida penatai aki ini kami dulu menya dibai Tuhan ari menua Ejjip? Tuhan udah ninggal ka kami lalu nyerah ka kami ngagai orang Midian.”

Dataika lebu mayu Tuhan meri semangat ngagai iya sereta bejanji deka selalu nyereta iya, Gidion nyaut “Kati ko aku tau ngelepas ka orang Israel? Nuan nemu, purih kami tu orang ti pengabis baruh dalam raban bansa Manasi, tambah mega aku orang ti pemadu merinsa ari bala menyadi aku ti bukai.” (ayat 15).

Tang ba luar penakut enggau asai ti enda ulih iya ketegal pengasih Tuhan, Gidion ulih nyelamta orang Israel taja pan beraban mimit aja lelaki. Tu meh pengasih Tuhan iya ti ngaga mayuh utai nyelai.

E. PENGASIH TUHAN BA DALAM PENGIDUP RASUL PAUL

Bacha Surat Pasal Kereja Rasul 15:40. Sebedau Paul enggau Silas berengkah bejalai nusi berita Injil, seduai enggau raban di Antiok besampi ka seduai lalu ngasuh seduai nitihka pengasih Tuhan ba kereja ti ditangkupka ngagai seduai. Bacha penerang Paul ngenang pengasai iya ba 2 Korint 11:22,33.

Paul nyerah kadiri dulu ngagai pengasih Tuhan. Iya begunaka pengasih Tuhan kena beretan. Saut Tuhan ngagai sebana Paul ba senentang pengelemi iya nya siti janji Tuhan ngagai kitai mega:

“Tang ko saut Iya: “Semina pengasih aku aja enda tau enda diguna nuan, laban kuasa pemadu kering lebu nuan lembut.” (2 Korint 12:9a).

F. PENGASIH TUHAN DIBERI NGAGAI DALAM PENGIDUP KITAI

Ba dalam kaul antara kitai enggau Tuhan, lebu mayu kitai bejalai enggau Iya setiap hari, kitai betunga enggau utai ti nguji deka ngelabuhka pengarap kitai. Perening kitai ngagai Tuhan ianya arap ngagai leka jaku Iya. Kitai mandangka pengarap kitai nengah pendiau ti ngasi ka Iya.

Utai tu nunjukka kitai arap ka perintah Tuhan ulih ngubah utai ti udah disadang nyadi sebedau tu ulih berubah nyadi lain. Perening Tuhan ngagai pengarap kitai ba senentang mulia Iya, pengering Iya ti enda ulih banding deka meri kitai menang dalam semua utai.

G. DUA JANJI TI BEGUNA

1. Kitai Enggau Berani Tama Ke dalam Perintah Pengasih Tuhan

Heb 4:16 madah ka “Awak ka kitai berani mansang ka mua ngagai **penuduk Allah Taala endur ti bisi pengasih**. Dia kitai deka **nyambut penyinu lalu tetemu ka pengasih ti tau nulung kitai lebu kitai beguna ka iya.**”

2. Tuhan Ulih

“Lalu Allah Taala ulih meri ka kitai pengasih ti lebih mayuh ari ti diguna kitai, ngambi ka kita deka selalu bisi utai ti diguna kita empu, lalu bulih lebih ari chukup ka genap bengkah kereja kita ti badas.” (2 Korint 9:8).

TANGGUNG PENGAWA AKU

Aku mutus ati nerima pengasih Tuhan, pengering Iya ti enda ulih banding, ba setiap penusah ti datai ba pengidup aku lalu ngajar orang bukai awak ka ngereja utai ti sama.